

Ecumenissem en il chantun Vad

Dieta a Losanna davart il Proxim Orient (5–7 da zercladur)

DA GUIU SOBIELA-CAANITZ

■ **Il 2013 dumbrava il Vad 748815 olmas – bunamain quatter giadas dapli ch'il Girschun (194935). Dapi onns datti ina Cuminanza da las baselgias cristianas en il chantun Vad (CECCV; www.ceccv.ch).** Lur glista multifara è tipica d'in pajais nua che baselgias tradiziunalas, cunzunt las duas catolicas (1) e la reformada, ma era la luterana e la metodista, vivan sper cuminanze immigradas, sco quatter patriarchats ortodoxs (Istanbul/Constantinopel, Moscau, Rumenia e Serbia), la baselgia presbiteriana da Scozia, la copta (d'Egipta), quella da l'Etiopia e quella da l'Eritrea. Igl è remartgabel che gruppas uschè variadas èn tuttina vegnidas adequada da bajegiar in'uniun tetgala cuminaivla. Igl è anc pli remartgabel ch'i han fatg endament las diasporas dal Proxim Orient, tranter Caucasus, Mar cotschen e Golf da la Persia. La CECCV declera: «A la fin dal 19avel tschientaner ed a l'entschatta dal 20avel ha la ruina da l'imperi osmanic manà a genocids da populaziuns cristianas: Armens, Assirians e Sirians. L'onn 1915 è stà il pli snuaivel. Noss pajais dal vest eran infurmads, ma n'han betg reagì. Ins commemorescha ussa lez drama d'avant tschient onns (...). La CECCV arranscha ina dieta da

trais dis averta ad in e scadin (...). Nus dain il pled ad istorichers, a perditgas da la situaziun actuala, a personalitads da la sentupada tranter culturas (...). Infurmaziuns: <info@ceccv.ch>

Dapi l'imperi osmanic

La dieta entschaiva venderdi, ils 5 da zercladur da las 19.00 a las 22.00 a Losanna, en la «Maison Saint Jean», avenue de Cour 138. L'istoricher ed orientalist Hans-Lukas Kieser (Universitad da Turitg) referescha davart l'imperi osmanic, lura l'istoricher Mehmet Polatel (Universitad Koç, Istanbul) ed il giurist Philippe Kalfayan (Paris) davart il genocid armen, e finalmain il politolog Joseph Yacoub (Universitad catolica da Lyon) davart il genocid assirian e sirian. Yacoub ha scrit l'essai: «Qui s'en souviendra? 1915: le génocide assyro-chaldéosyriaque» (Cerf, Paris 2014). Er ils referats da sonda, ils 6, da las 14.00 a las 16.00 han lieu a Losanna, avenue de Cour 138. L'emprim rapporta l'orientalist Jordi Tejel (University of Exeter), lura Carla Kijoyan (Cussegl ecumenic da las baselgias, Genevra) davart las baselgias en l'Orient, finalmain archuvestg em. Georges Casmoussa e la lavurera sociala ed apotecra Ani Boudjikianian, domadus a Beirut (Libanon). Da las 16.00 a las 16.45 chanta in quintet da

l'Armenia en la baselgia Saint-François da Losanna. Dumengia, ils 7, da las 15.00 a las 17.00 a Losanna (salle Notre Dame, Rue Pré du Marché 6) refereschan trais personalitads davart las vistas da convivenza: – archuvestg Petrosian, parsura da la Societad biblica da l'Armenia; – Rakel Dink, vaiva dal schurnalist armen d'Istambul Hrant Dink (1954–2007), mediatur tranter omadus pievels ed ami dal scriptur tirc Orhan Pamuk (premi Nobel da litteratura 2006); – Mohamed Jamouchi (Bruxelles/Brusel), secretari general da la Conferenza mundiala da las religiuns per la pasch.

A las 18.00 en la catedrala da Losanna entschaiva in cult divin ecumenic. La medema dumengia, 7 da zercladur, ad Arth/SZ, arranscha la baselgia reformada da Turitg ina sentupada en la claustra «Mor Augin» da la baselgia ortodoxa siriana (2). Lezza baselgia dumbrava milliuns commembras e commembras en il mund, var ¾ da quels vivan en il stadi da Kerala (India dal sidvest). Questa fin d'emna è pia deditgada spezialmain a cuminanze cristianas che vivan en Orient dapi blers tschientaners.

1. La «catolica romana» e la «catolica cristiana».

2. Infurmaziuns: <annemarie.huber@zh.ref.ch>